



Attaveqarnermut, Avatangiisinut Aatsitassanullu Naalakkersuisoq
Landsstyremedlem for Infrastruktur, Miljø og Råstoffer

Inatsisartunut ilaasortaq Olga P. Berthelsen, Inuit Ataqtigiit
/MAANI

Pensionisiallit angalasut akikillisaavigineqartarnerat

Asasara Inatsisartunut ilaasortaq Olga P. Berthelsen.

Aallarniutigalugu pensionisiallitt Kalaallit Nunaanni angalasut akikillisaavigineqarnissamut periarfissaat pillugit apeqqutinnut, Inatsisartut suleriaasianni § 36, imm. 1 naapertorlugu saqqummiussannut qutsaviginiarpakkit. Matuma kinguliani apeqqutitit pingasut akissuteqarfigissavakka.

17.03.2009

Postboks 909
3900 Nuuk
Oq/tel +299 34 54 00
Fax +299 34 54 10
aan@gh.gl
www.nanoq.gl/aan

Nunatsinni utoqqalinersiuteqartut angallannikkut akikillisaavigineqartarnerat, malittarisassat suut sorliillu tunngavigalugit ingerlanneqarpat?

Angallannerup ilusaanut tunngatillugu angallaviit niuernermik tunngaveqartut aamma angallaviit kiffartuunneqarnissamik isumaqatigiissutit tunngavigalugit Namminersornerullutik Oqartussanit tapiiffigineqartartut immikkoortissallugit pingaaruteqarpoq.

Angallaviit niuernermik tunngaveqartut pingaartumik Kalaallit Nunaanni illoqarfiit akornanni assartuinnermut tunngasuupput. Taakkunani angallassisup angallaviit atatiinnarniarlugit naleqquttumik tunisaqarsinnaanissaanut ilaasutigut tunngavissat naammattarput. Angallavinni niuernermik tunngaveqartuni angallassisup pineqartup kisimiilluni akit ilusilersornissaat aalajangertarpei, taakkunungalukikkut akikillisaavigineqassanersut, akikillisaallu aalajangiunneqartoq qanoq annertutigissanersoq ilaatinneqartarluni. Taamatutaaq angallassisup nammineerluni angallavimmi angallassinerit qanoq akulikitsigissanersut aalajangertarpaa.

Kisiannili angallaviit ilaat pisortat tapiisanngitsuuppata angallavigineqarsinnaasimassanngikkaluarput. Taamaattumik Namminersornerullutik Oqartussat kiffartuunneqarnissamik isumaqatigiissuteqartarput, Kalaallit Nunaanni innuttaasut sumiiffinnit tamanit angalanissamut periarfissaqarnissaannik qulakkeerisussanik. Taakkununga Nunap Karsiata aningaasaataanit ukiumut 120 mio. koruunerpiaat atorneqartarput. Pingaartumik nunaqarfinnut nunaqarfinniillu, kiisalu illoqarfiit avinngarusimanerusuniittunut (Qaanaamut, Illoqqortoormiunut aamma Tasiilamut) assartuinerit kiffartuunneqarnissamik isumaqatigiissuteqarfigineqartarput. Kiisalu

Kalaallit Nunaata kujataani distriktini timmisartuussinerit tamarmik tapiiffigineqartarput, taakkununggalu illoqarfiit pingasut pineqartut ilaatinneqarput.

Kiffartuunneqarnissamik isumaqatigiissutini piumasaqaatinik, angallassisut naammassisassaannik ilaatitsisoqarpoq. Taamaattumik angallassisut namminnerlutik akit aalajangersarsinnaangilaat, taamatullu angallaviit ataasiakkaat tikinneqartarnissaannut ikinnerpaaffissarititaasut malittussaallugit, amerlanerpaanullu sapaatit akunnerannut ataasiarluni tikittoqartarnissaa/aallartoqartarnissaa minnerpaaffiliunneqartarpoq.

Kiffartuunneqarnissamik isumaqatigiissutini inuiaqatigiit ilaannut akikillisaassinissamik piumasaqaateqartoqarneq ajorpoq. Sumiiffinnut sumiiffinniillu, pisortanit tapiissuteqartoqarsimangikkarluarpat assartuinissamut periarfissaqartinneqarsinnaangitsunut angalanissamut periarfissiinissaq siunertaralugu isumaqatigiissusiortoqartarpoq. Bilitsit akisuallaarnerat, taamaalillunilu kikkulluunniit angalanissamut periarfissaqartussaanginnerat, imaluunniit angallavimmi ataatsimi tikittartut akulikissusiisa annikippallaarnerat, taamaalillunilu angalanissamik pilersaarusiornissamut periarfissaqannginneq tamatumunnga peqqutaasinnaavoq.

Tassalu innuttaasut ataatsimut isigalugit angalanissamut periarfissaqarnissaasa qulakkeerneqarnissaa kiffartuunneqarnissamik isumaqatigiissutini siunertarineqarpoq, taakkunanilu meeqqat, ilinniartut, pensionisiallitt inuiaqatigiinniluunniit ilaasut allat immikkoortinneqanngillat.

Kiisalu tamatumunnga tunngatillugu oqaatigineqassaaq, angallavinni pisortanit tapiiffigineqartuni angallassisut akikillisaassinarijata Namminersornerullutik Oqartussat soorunami tamatumunnga akornusiiniangimmata. Tassalu Disko Line, aasaanerani Qeqertarsuup Tunuani illoqarfiit nunaqarfiillu akornanni angallassisartoq pensionisialinnut tapiissuteqartartoq ilisimavara. Taamatutaaq Air Greenland Kalaallit Nunaata Kujataani pensionisialinnut illoqarfiit akornanni angalasunut akikillisaassisarpoq, Air Greenlandillu angallavimmini pisariitsuutitsinissaq tunngavigalugu taassuma ilaatinneqarnissaa aalajangiussimavaa.

AUL-p ingerlassaanni nunaqarfimmiit nunaqarfimmut, nunaqarfimmiit illoqarfimmut aammalu illoqarfimmiit illoqarfimmut qanoq aqqissuussiffigineqartarpat?

Arctic Umiaq Line A/S (AUL) niuernerinnarmik tunngaveqarluni angallassisarpoq, taamaattumillu Namminersornerullutik Oqartussat AUL-ip akigititanut aalajangersaanerani akulerunneq ajorpoq. Tassalu Namminersornerullutik Oqartussat aqqissuussinernut aammalu Kalaallit Nunaanni nunaqarfinnut nunaqarfinniillu ilaasunik angallassinermut tunngatillugu AUL-imut isumaqatigiissuteqarsimangillat.

Tamatumunngali tunngatillugu oqaatigineqassaaq, Kalaallit Nunaata qeqqani ilaasunik angallassinissamut Royal Arctic Bygdeservice A/S-imut (RAB) kiffartuunneqarnissamik Namminersornerullutik Oqartussat isumaqatigiissuteqarmata, taassumalu ataani nunaqarfiit ilaasa angallavigineqarnissaat pillugu RAB-ip AUL pilersuisutut

isumaqatigiissuteqarfigisimammagu. Angallavinni taakkunani AUL-ip RAB-imut kiffartuussinissamik isumaqatigiissummi tunngavissat malittussaassavai, tassanili pensionisialinnut akikillisaassinissamut piumasaaqateqartoqanngilaq.

Air Greenland-ip sullissinermut isumaqatigiissutaani, utoqqalinersiuteqartut tapiiffigineqartarnerat qanoq aaqqissuussiffigineqarsimava?

Kiffartuunneqarnissamik isumaqatigiissut, 1. januar 2006-miit 31. december 2010-mut atuuttussatut Namminersornerullutik Oqartussat aamma Air Greenland A/S-ip akornanni Kalaallit Nunaanni timmisartuussinissaq pillugu isumaqatigiissut naapertorlugu matuma siuliani taaneqartut tunngavigalugit innuttaasut ilaannik akikillisaassisinnaanissamik isumaqatigiissuteqartoqanngilaq.

Tamanna oqaatigereerlugu ilassutigineqassaaq, Air Greenland angallavinni, ingerlatseqatigiiffiup Kalaallit Nunaanni illoqarfiit akornanni assartuiffigisaanni tamani (Qaanaap Upernaviullu akornanni angallavik kisiat pinnagu), aammalu Kangerlussuarmut, Narsarsuarmut aamma Alluitsup Paanut angallaviini, angalasut 60-ileereersimasut tamarmik 50%-imik akikillisaavigineqartarmata.

Ikinngutinnersumik inuulluaqqusillunga

Kim Kielsen